

**ՍՍՀՄ ԳԵՐԱԳՈՒՅՆ ՍՈՎԵՏԻ ԿԱԼԵԱԳԱՀՈՒԹՅԱՆ  
Հ Ր Ա Մ Ա Ն Ա Գ Ի Ր Ը**

ՀԱՅԿԱԿԱՆ ՍՍՀ ԳԻՏՈՒԹՅՈՒՆՆԵՐԻ ԱԿԱԴԵՄԻԱՑԻ ԱԿԱԴԵՄԻԿՈՍ  
Մ. Գ. ՆԵՐՍԻՍՅԱՆԻՆ Լ Ե Ն Ի Ն Ի ՇՔԱՆՇԱՆՈՎ ՊԱՐԳԵՎԱՏՐԵԼՈՒ ՄԱՍԻՆ

Երկարամյա բեղմնավոր գիտա-մանկավարժական ու հասարակական գործունեության համար և ծննդյան 60-ամյակի կապակցությամբ Հայկական ՍՍՀ պիտույությունների ակադեմիայի ակադեմիկոս, Երևանի պետական համալսարանի ռեկտոր ընկ. Մկրտիչ Գեղամի Ներսիսյանին պարգևատրել Լենինի շքանշանով:

ՍՍՀՄ Գերագույն սովետի նախագահության նախագահ՝ Ն. ՊՈՒԿՏՈՒՆԻ  
ՍՍՀՄ Գերագույն սովետի նախագահության քարտուղար՝ Մ. ԳԵՈՐԳԱՋԵ

Մոսկվա, Կրեմլ, 24 նոյեմբերի 1970 թ.:

Մ. Գ. Ներսիսյանը ծնվել է 1910 թ. նոյեմբերի 25-ին, Հայկական ՍՍՀ Աշտարակի շրջանի Փարպի գյուղում: 1927 թ. ավարտել է Երևանի խաչատուր Աբովյանի անվան միջնակարգ դպրոցը, 1931 թ.՝ Երևանի պետական համալսարանի պատմա-գրական ֆակուլտետի պատմության բաժինը:

1931—1941 թթ. Մ. Ներսիսյանը զբաղվել է գիտական աշխատանքով, 1940 թ. նա նշանակվում է ՍՍՀՄ գիտությունների ակադեմիայի հայկական ֆիլիալի պատմության և նյութական կուլտուրայի ինստիտուտի դիրեկտոր: 1941—1943 թթ. Մ. Ներսիսյանը մասնակցում է Հայրենական մեծ պատերազմին:

1943—1944 թթ. Մ. Ներսիսյանը աշխատում է Երևանի պետական համալսարանում, որպես պատմության ֆակուլտետի ղեկան, 1944—1946 թթ.՝ գիտությունների նորաստեղծ ակադեմիայի պատմության ինստիտուտի դիրեկտորի պաշտոնակատար, իսկ 1946—1950 թթ.՝ ՀԿԿ Կենտկոմին կից մարքսիզմ-լենինիզմի ինստիտուտում, որպես նրա դիրեկտորի տեղակալ:

Մ. Գ. Ներսիսյանը 1950 թ. ընտրվում է Հայկական ՍՍՀ գիտությունների ակադեմիայի ակադեմիկոս և մինչև 1966 թ. աշխատում էր որպես ակադեմիայի վիցե-պրեզիդենտ (11 տարի), հասարակական գիտությունների բաժանմունքի ակադեմիկոս-քարտուղար և խմբագրական-հրատարակչական խորհրդի նախագահ (5 տարի): 1950 թվականից մինչև օրս անընդմեջ ընտրվել է ակադեմիայի նախագահության անդամ: 1966 թ. ապրիլին նա նշանակվում է Երևանի պետական համալսարանի ռեկտոր և այդ պոստում մնում է առ այսօր:

Մ. Ներսիսյանը վարել է նաև մանկավարժական աշխատանք՝ տարիներ շարունակ դասավանդելով հայկական և ռուսական մանկավարժական ինստիտուտներում և պետական

համալսարանում: 1939 թ. նա պաշտպանել է թեկնածուական դիսերտացիա, 1946 թ.՝ դոկտորական: 1947 թ. Մ. Ներսիսյանին շնորհվել է պրոֆեսորի, իսկ 1961 թ.՝ Հայկական ՍՍՀ գիտության վաստակավոր գործչի կոչում:

Պրոֆ. Ներսիսյանը մեծ վաստակ ունի սովետահայ պատմական գիտության զարգացման բնագավառում: Սկսած 1930-ական թթ. կեսերից նա հրատարակել է մի քանի տասնյակ մեծ ու փոքր աշխատություններ: Դրանցից առանձնապես հարկ է նշել նրա հետևյալ մենագրությունները. «Նարոզնիկական խմբակներն Անդրկովկասում» (1940), «Հայ ժողովրդի ազատագրական պայքարը թուրքական բռնապետության դեմ» (1955), «Դեկաբրիստները Հայաստանում» (1958), «Ռուս-հայկական հարաբերությունների պատմությունից» (ռուսերեն, գիրք I, 1956, գիրք II, 1961), «1812 թ. Հայրենական պատերազմը և Կովկասի ժողովուրդները» (ռուսերեն, 1965): Առանձնապես մեծ արձագանք գտավ նրա «Կազմած ու խմբագրած «Հայրի գեներալը Օսմանյան կայսրության մեջ» փաստաթղթերի և նյութերի ընդարձակ ու հարուստ ժողովածուն (ռուսերեն, 1966), ուր մերկացվում են թուրք շարդարարների ոճրագործությունները՝ Աբդուլ Համիդից մինչև 1918 թ.:

Պրոֆ. Ներսիսյանը «Պատմա-բանասիրական հանդես»-ի հիմնադիրներից մեկն է և նրա ղեկավար խմբագիրը՝ «Հանդես»-ի ստեղծման օրից (1958 թ.) մինչև հիմա:

Մ. Ներսիսյանը 1938 թվականից Սովետական Միության կոմունիստական կուսակցության անդամ է: Եղել է ՀՍՍՀ Գերագույն սովետի դեպուտատ, իսկ ներկայումս հանդիսանում է Սովետական Միության Գերագույն սովետի դեպուտատ: Պարգևատրված է Աշխատանքային կարմիր դրոշի շքանշանով և վեց մեդալներով:

«Պատմա-բանասիրական հանդես»-ի խմբագրությունը ստագին շնորհավորում է մեծարգո հորելյարին՝ ծննդյան 60-ամյակի և Լենինի շքանշանով պարգևատրվելու առթիվ և ցանկանում նրան երկար տարիների ֆաչառողջ կյանք ու արգասավոր աշխատանք: